

**STANDARDNE OPERATIVNE PROCEDURE IZMEĐU
MINISTARSTVA SIGURNOSTI BOSNE I HERCEGOVINE I
MINISTARSTVA UNUTRAŠNJIH POSLOVA I JAVNE UPRAVE REPUBLIKE
CRNE GORE O PRUŽANJU POMOĆI U SLUČAJU PRIRODNE ILI DRUGE
CIVILIZACIJSKE KATASTROFE**

Na osnovu Sporazuma između Vijeća ministara Bosne i Hercegovine i Vlade Republike Crne Gore o saradnji u zaštiti od prirodnih i civilizacijskih katastrofa, potpisanog u Budvi, Republika Crna Gora, dana 7. septembra 2007. godine (u daljem tekstu: Sporazum), Ministarstvo sigurnosti Bosne i Hercegovine i Ministarstvo unutrašnjih poslova i javne uprave Republike Crne Gore (u daljnjem tekstu: ugovorne strane) uvjerene u nužnost brzog prelaska državne granice snaga zaštite i spašavanja, radi pružanja prekogranične pomoći u slučaju prirodnih i civilizacijskih katastrofa, sporazumjeli su se kako slijedi:

Član 1.

PREDMET STANDARDNIH OPERATIVNIH PROCEDURA

Shodno članu 7. Sporazuma, Ugovorne strane ovim Standardnim operativnim procedurama uređuju okvirne uslove saradnje o pružanju prekogranične pomoći u slučaju prirodnih i civilizacijskih katastrofa, a posebno u:

- planiranju i provođenju preventivnih mjera za zaštitu od požara otvorenog prostora u graničnom području;
- međusobnom obavješćavanju o požarima otvorenog prostora u graničnom području;
- međusobnoj pomoći pri gašenju požara otvorenog prostora i požara u koje su uključene hemikalije u graničnom području;
- brzom i neometanom prelasku vatrogasnih ili drugih jedinica zaštite i spašavanja preko državne granice;
- međusobnom obavješćavanju i razmjeni podataka o opasnosti nastanka i nastanku drugih prirodnih ili drugih civilizacijskih katastrofa u graničnom području;
- međusobnoj pomoći pri odgovoru na prirodnu ili civilizacijsku katastrofu u graničnom području,
- brzom i neometanom prelasku jedinica i opreme preko državne granice, kao i tranzitu za pomoć trećim državama.

Član 2.

ZNAČENJE IZRAZA

Shodno članu 2. Sporazuma, za potrebe ovih Standardnih operativnih procedura koriste se i sljedeći izrazi:

1. «*Obavještenja i podaci o prirodnoj i civilizacijskoj katastrofi*» – su podaci i obavještenja o riziku nastanka i nastanku prirodne ili civilizacijske katastrofe u graničnom području.
2. «*Vatrogasne ili druge jedinice zaštite i spašavanja*» – su ukupni ljudski resursi koji učestvuju u odgovoru na prirodnu ili civilizacijsku katastrofu lokalnih i prekograničnih razmjera.
3. «*Primalac*» - je država na čijem teritoriju je nastala prirodna ili civilizacijska katastrofa i koja je tražila međunarodnu pomoć.
4. «*Pošiljalac*» - je država koja šalje brzu pomoć na zahtjev primaoca.
5. «*Granično područje*» - je područje 10 km zračne linije od državne granice prema unutrašnjosti.

Član 3.

NADLEŽNOST ZA DONOŠENJE ODLUKE O UPUĆIVANJU JEDINICA PREKO DRŽAVNE GRANICE

Za slanje i primanje zahtjeva za pomoć, nadležni su:

- Ministarstvo sigurnosti Bosne i Hercegovine, i
- Ministarstvo unutrašnjih poslova i javne uprave Republike Crne Gore.

Član 4.

OPERATIVNI CENTAR

Svaka ugovorna strana dužna je odrediti jedinstveni operativni centar za međusobnu komunikaciju (u daljnjem tekstu: operativni centar).

Operativni centar nadležan je za provedbu procedure traženja i slanja jedinica i opreme, koordinaciju njihovog prelaska preko državne granice, kao i razmjenu informacija od

značaja za zaštitu i spašavanje ljudi i materijalnih dobara u području zajedničkog djelovanja.

Ispred Ministarstva sigurnosti Bosne i Hercegovine:

Naziv: Operativno - komunikacijski centar Granične policije BiH
Nadležna osoba: Dežurni operator
Telefon: +387 33 755 300; +387 33 755 301; i 387 33 755 302
Fax: +387 33 755 305; i +387 33 755 306
E-mail: dgs_bih@paleol.net

Ispred Ministarstva unutrašnjih poslova i javne uprave Republike Crne Gore

Naziv: SEKTOR ZA VANREDNE SITUACIJE I CIVILNU BEZBJEDNOST-
Operativni komunikacijski centar 112
Nadležna osoba: Dežurni operator
Telefon: + 382 81 481 801; 382 81 481 802 ;
Fax: + 382 81 227 325 ;
E-mail: mup.emergency@cg.yu

Član 5.

PROCEDURA TRAŽENJA I SLANJA JEDINICA I OPREME

Ugovorne strane dužne su međusobno razmjenjivati obavještenja i podatke o riziku nastanka katastrofe i o njenom nastanku (prilog 1. – "Obavještenje o nesreći/ katastrofi").

Ukoliko jedna od država primijeti potencijalnu opasnost nastanka katastrofe ili nastanak katastrofe na području druge države, operativni centar države koja je primijetila nastanak opasnosti ili katastrofe o tome će obavijestiti operativni centar države u kojoj je nastala opasnost ili konkretna katastrofa i dogovoriti eventualnu proceduru pomoći.

Ukoliko država primalac procijeni da nije u mogućnosti s vlastitim jedinicama odgovoriti na nastalu katastrofu u graničnom području, može preko operativnog centra uputiti zahtjev za pomoć (prilog 2. – "Zahtjev za pomoć").

Država koja je primila zahtjev za pomoć dužna je u najkraćem mogućem roku preko operativnog centra uputiti ponudu za pomoć (prilog 3. – "Ponuda za pomoć").

Nakon prihvatanja ponuđene pomoći (prilog 4. – "Prihvat ponuđene pomoći") država pošiljalac upućuje jedinice i opremu na teritorij države primaoca.

Država primalac dužna je tokom zajedničke akcije odgovora na katastrofu u graničnom području, dnevno upućivati izvještaj u operativni centar države pošiljaoca (prilog 5. – "Dnevni situacijski izvještaj").

Ukoliko situacija zahtjeva izuzetno brzo djelovanje, operativni centri države pošiljaoca i države primaoca mogu verbalno razmijeniti zahtjev za pomoć, ponudu za pomoć i prihvat ponuđene pomoći, što naknadno moraju i pismeno potvrditi.

Ugovorne strane će omogućiti tranzit preko svoje teritorije jedinica i opreme pomoći trećim zemljama po međunarodnim standardnim operativnim procedurama, na zahtjev za pomoć treće strane.

Član 6.

PROCEDURA PRELASKA JEDINICA PREKO DRŽAVNE GRANICE

Postupak prelaska jedinica preko državne granice određen je članom 10. i 11. Sporazuma.

Obrasci za prelazak ljudi i opreme preko državne granice definirani su prilogom 6.

Član 7.

KORIŠTENJE LETJELICA

Korištenje letjelica definirano je članom 12. i 13. Sporazuma.

Ukoliko letjelice obavljaju izviđanje, snimanje pogođenog područja, medicinske evakuacije ili neke druge složene operacije, a radi izbjegavanja mogućnosti nastanka nesreće, država pošiljalac će u skladu sa potrebama poslati stručnu ekipu za navođenje, komunikaciju i koordinaciju između posada letjelice i snaga na tlu.

Član 8.

NADLEŽNOST U VOĐENJU AKCIJE ZAŠTITE I SPAŠAVANJA

Nadležnost u vođenju akcije definirana je članom 14. Sporazuma.

Ukoliko se akcija odgovora na katastrofu obavlja na području koje je minirano, država primalac će osigurati stručnu pratnju jedinicama države pošiljaoca za vrijeme akcije zaštite i spašavanja.

Član 9.

UPOTREBA SREDSTAVA VEZE

Država primalac dozvoljava korištenje sredstava radio uređaja jedinici koja dolazi iz države pošiljaoca. Država pošiljalac se obavezuje da će njene jedinice koristiti odgovarajuće frekvencije za zaštitu i spasavanje koje su propisane njenim Zakonom.

Član 10.

NAČIN FINANSIRANJA TROŠKOVA POMOĆI, NAKNADE I ODŠTETE

Država pošiljalac obezbjeđuje samostalno djelovanje jedinice za pružanje pomoći tokom 48 časova.

Način finansiranja troškova pomoći, naknade i odštete definicane su članom 16. i 17. Sporazuma.


Član 11.

STUPANJE NA SNAGU

Ove Standardne operativne procedure primjenjuju se od dana potpisivanja.


Sastavljeno u Budvi, Republika Crna Gora, dana 07. septembra 2007. godine u dva (2) originala, svaki od njih na službenim jezicima Bosne i Hercegovine – bosanskom, srpskom i hrvatskom jeziku i na crnogorskom jeziku, pri čemu su svi tekstovi jednako vjerodostojni.

**Za Ministarstvo bezbjednosti
Bosne i Hercegovine**



**Tarik Sadović
Ministar**

**Za Ministarstvo unutrašnjih poslova i
javne uprave Republike Crne Gore**



**Jusuf Kalamperović
Ministar**